

Las obras da Glaser derasan calma

Exposiziun da purtrets da Rudolf Glaser a Tarasp

Ils purtrets da Rudolf Glaser sun da visitar in sia galleria a Fontana/Tarasp amo fin als 18 october. Seis purtrets derasan ün'atmosfera fich agreabla e prüvada.

Sonda passada ha drivi l'artist Rudolf Glaser las portas da seis atelier ed invidà a la vernissascha da sias lavuors da l'ultim temp. El ha s-chaffi sur ils ons üna tecnica tuottafat aigna chi dà a sias pituras üna preschentscha particulara. «Eu pigl üna surtratta da fieuter e sün quella fetsch eu üna veta da gip bletsch da circa trais fin quatter millimeters. Cur cha'l gip es süt e dür vegnan lasura las culuors e la pittura.» Cun quai cha la vetta da gip es fina daja sfessas e quellas dan a mincha purtret ün fuond particular. Per cha la suotconstrucziun dal purtret dvainta stabila vain quella pel solit tachada sün vaider da plexi.

Daspö l'on 2003 a Tarasp

Rudolf Glaser viva daspö l'on 2003 cun sia partenaria a Tarasp ed ha pudü tour a fit illa chasa Baumhauer a Fontana dasper si'abitaziun eir ün atelier. «Fin pro mia pensiun n'haja eir lavurà giò la Bassa sco magister, ed uossa am pos eu dedichar plainamäing a mia paschiun, la pittura.»

Sias obras derasan quietezza ed armonia ed as preschaintan in differentas culuors. Suvent as chatta in seis purtrets üna lingia orizzontala in ün'otra culur sco il rest. Quella sparta il purtret opticamaing in duos parts. Ils orizzonts sun bain visibels e domineschan sias obras. «Cur ch'eu cumainz ün purtret nu saja amo precis co cha quel as preschainta a la fin.»

Sper las tecnicas da la pittura classica lavura'l vie e plü eir cul gip. Pro quista metoda da lavur experimentescha Rudolf Glaser eir culla tecnica da sgrattar la surfatscha dal purtret in möd, cha'l gip vain visibel tras las vettas da culur. Eir il president dal cumün da Scuol, Christian Fanzun, es inchantà da las lavuors da Glaser. «Eu sun stat fingià repetidamaing a las vernissaschas dals ul-

tims ons e sun surprais da la bella schelta d'ouvras d'art chi vegnan s-chaffidas quà a Tarasp», ha el dit in occasiun da l'exposiziun d'atelier actuala. (anr/bcs)

L'exposiziun d'ouvras da Rudolf Glaser a Tarasp es averta amo fin als 18 october adüna lündeschi fin venderdi da las 14.00 fin las 19.00 e la sonda e dumengia da las 10.00 fin las 12.00 e da las 14.00 a las 18.00. www.rudolfglaser.ch



Rudolf Glaser inclegia si'art sco ün gö: «Sch'eu til guadogn, alura dvaintan la talla, ils actuors ed eu ün'unità.» fotografia: Benedict Stecher